



**PRIMEIRO
MINISTRO**

**DISKURSU SUA EXELÉNSIA PRIMEIRU-MINISTRU REPÚBLIKA
DEMOKRÁTIKA TIMOR-LESTE,
DR. RUI MARIA DE ARAÚJO,
IHA OKAZIAUN SESAUN SOLENE ABERTURA IV REUNIAUN MINISTRUS
INTERIOR NO ADMINISTRASAUN INTERNA CPLP**

**Salaun Nobre Ministériu Negósius Estranjeiro no Koperasaun, Díli
26 Outubru 2015**

Exelénsias

Señora no Señores Ministrus Interior no Administrasaun Interna Estadu-Membru CPLP, no representantes sira hotu
Reprezentante Sekretariadu Ezekutivu CPLP
Membru Parlamentu sira hotu
Kolega Membru Governu sira hotu
Ex-Prezidente Repúblika Demokrátika Timor-Leste

Exmus. Señores no Señoras
Membru Delegasaun Estadu-membru CPLP sira hotu
Korpu Diplomátiku

Señoras no Señores,

Bem-vindo ba imi hotu! Ho laran ksolok maka ami simu imi iha ami nia rain. Hau hein katak imi bele iha oportunidade hodi bele hetan rezultadu di'ak ruma husi Timor-Leste no hau hatene mós katak imi iha ona ajenda ida ne'ebé nakonu molok mai iha Díli, sidade ne'ebé hanaran "Cidade da Paz".

Hato'o hau nia saudasaun espesial ba reprezentante Ministeriu Interior no Koperasaun Lokal Gine Ekuatorial nian, ne'ebé ba dala uluk marka prezensa iha Reuniaun sektor ida ne'e nian, hodi fó nia rekoñesimentu no kompromisu ba iha nesesidade hodi reforsa no habelar liu tan koperasaun iha sektor seguransa, tuir prinsípius ne'ebé hakerek ona iha Estatutu CPLP nian, hodi fó atensaun maka'as liu ba Paz, Demokrasia, Estadu Direitu, Direitus Umanus no Justisa Sosial, respeito ba integridade no promosaun dezvoltimentu.

Timor-Leste partisipa tiha ona reuniaun ba dala uluk iha tinan 2008, Reuniaun Ministrus Interior no Administrasaun Interna CPLP nian, maibé bainhira hanesan país ne'ebé assume Prezidênsia *pro tempore* ita nia Komunidade nian, no orgullu tebe tebes bainhira ita bele halibur hamutuk fali iha IV edisaun reuniaun bianual ida ne'e.

Koalia kona ba Seguransa la'os koalia deit ba seguransa umana maibé koalia mós ba seguransa iha ita nia rai laran, hodi kombate hasoru atividades ilegal no kriminalidade ekonómika, maka ho ida ne'e kontribui ba estabilidade polítika, ekonómika no populasaun sira nian.

Koalia kona ba seguransa, halibur hamutuk ita nia esperiênsia – ida idak ho nia espesividade – reflète hamutuk kona ba dezafius oin oin ne'ebé ita hasoru agora dadaun hodi bele lori ita ba iha sociedade ida ne'ebé prósperu no dezvoltidú, la'os deit ba iha tempu ne'ebé presiza maibé sai hanesan nesesidade ida.

Bainhira ami simu kna'ar Prezidênsia Komunidade ida ne'e nian, ami hakarak tau iha oin karater global ida, hodi konsidera katak globalizasaun hanesan faktu ida hodi sai hanesan realidade ida ne'ebé país hotu hotu labele hasees an hosi ne'e. Ami hakarak katak ho globalizasaun ne'e fó impulsu boot ida ba kresimentu ekonómiku iha ita nia paizes hotu hotu, atu bainhira sei sai hanesan membrus Komunidade ita nian no mós iha nível rejional ka internasional.

Husi globalizasaun ne'ebé hamosu interdependênsia, maka Seguransa sai krusial ba iha arkitetura rejional. Estabilidade rejional fó kontribuisaun ba ézitu ba iha ita nia estratejia sira hotu, hodi haboot liu tan konfiansa ba iha rai hotu hotu, nune'e mós ba iha investimentu ekonómiku.

Pozisaun geoestratéjika hanesan previlejiu ida ba Timor-Leste, iha oseano Pacífiku no oseano Índiku nia klaran, benefisia no potencializa ita nia kompetitividade hanesan Komunidade, hodi loke odamatan ba parserias multilaterais, aumenta atividade ekonómikas no empresariais,

ne'ebé sei fó dezentvolvimentu ekonómiku hodi hadi'ak liu tan kondisaun vida ita nia populasaun sira nian.

Ami hatene katak atu dada investimentu fundamental ida ne'e ba ita hotu nia dezentvolvimentu, importante tebes atu paizes hotu hotu iha seguransa no estabilidade, moris iha klima paz ne'ebé duradoura, tanba se la hanesan ne'e sei la iha dezentvolvimentu sustentável.

Iha semana hirak liu ba, iha Nova Iorque, ita nia paizes hamutuk ho rai sira seluk iha mundu aprova ona Objetivus ba Dezentvolvimentu Sustentável, inklui objetivu 16, ne'ebé reforsa elementus prinsipais ba paz, justisa no instituisaun sira nian. Nune'e maka ita konsidera katak, objetivu ida ne'e sai hanesan baze fundamental ba dalan dezentvolvimentu sustentável.

Ami hatene katak, tenke iha kondisaun ida ne'ebé maka hatudu seguransa no laabele iha risku ba ema hotu, liu liu ba iha investidor sira, maka ho nune'e dada investimentu hodi bele diversifika ita nia ekonomia. Ba ida ne'e setor barak maka sei kontribui, maibé setor Seguransa sei fundamental liu.

Ohin loron Timor Leste moris ona iha klima ida ne'ebé ho seguransa maka ami la'o dadaun ona iha dalan ne'ebé lós, nune'e ami haka'as an hodi bele dada investimentu, nasional ho estranjeiru, nu'udar pilar ida ba dezentvolvimentu país nian.

Tanba ne'e maka ohin ita halibur iha ne'e, hodi kontinua la'o ba dalan ida ne'e, la'os deit ba iha planu interno maibé ba mós iha planu internasional, tanba atu hari'i sosiedade ida ne'ebé globalmente seguru, depende liu ba ita nu'udar sidadaun no governantes, ita bele halo liu husi kontestu lokal no global hodi bele garante dignidade ita ema nian.

Nu'udar povu maun alin, ne'ebé partilla istória, valores no lian ida deit, ita hotu tenke fó liman ba malu hodi hari'i dalan ba paz, seguransa no dezentvolvimentu.

Exelénsias
Señoras e Señores,

Iha 2011 ami lansa Planu Estratéjiku Dezentvolvimento to'o 2030, bazeia identifikasaun ba nesesidade sira ne'ebé iha, halo definisaun ba objetivus estratéjikus ne'ebé atu alkansa no atividades sira ne'ebé atu dezentvolve hanesan projetus referênsia, hodi organiza no sistematiza dezentvolvimentu no konsolidasaun ba setores oin oin Estadu Timor nian, inklui mós setor Seguransa.

Atu hala'o planu ida ne'e, liu liu ba iha Instituisaun Protesaun Seguransa Timor-Leste nian, dezentvolve tiha ona Planu Estratéjiku Setoriais ho objetivu atu estabelese atividade ka projetus ne'ebé iha prioridade liu. Ami hakarak atinje nível boot liu ba iha efisiensia no implementasaun polítika pública seguransa ne'ebé di'ak, hodi hala'o presatasaun servisu ne'ebé di'ak liu ba sidadaun hotu hotu.

Iha rezultadu ne'ebé di'ak ba nível servisu operacional no valorizasaun institucional iha Instituisaun Protesaun no Seguransa, mai husi nesesidade dezentvolvimento no konsolidasaun, liu husi hasa'e kompetênsia no koñesimentu.

Ohin loron, bainhira koalia kona ba diminuisaun nível kriminalidade partisipada, redusaun ba tipu krime ne'ebé violentu liu no graves, manutensaun ba iha ordem pública, ba projetus inovadores no hetan rezultadu di'ak kona apoiu ba feto no labarik sira, ne'ebé sai hanesan vítimas ba violênsia doméstika no kombate hasoru sira nia agresores, partisipasaun iha misaun internacionais, hanesan kazu Giné Bissau, seguransa ba iha período eleisaun, programa espesial kona ba polisiamentu komunitáriu, koalia liu liu kona ba kontributu ami nia Polísia hodi

mantem Timor-Leste hanesan país ida no fó garantia liberdade no seguransa ba sidadaun sira no ba sira ne'ebé mai vizita ami nia rain.

Dadus sira ne'e mai husi kontribuisaun esforsu no serbisu husi sira ne'ebé maka fó seguransa no liberdade ba ami.

Importante tebe tebes maka alkansa ona seguransa no estabilidade maibé tenke mantém nafatin. Nune'e maka ami presiza tan meius no rekursus umanus liu tan hodi bele akompañá dezenvolvimentu ami nia sociedade no ami nia país. Ne'e sai hanesan dezafiu boot ida ba ami nia Estadu ida ne'ebé sei jovem liu, dezafiu ne'ebé ami simu ho responsabilidade no mosu loron loron deit.

Ami nia preokupasaun no esforsu planeamentu maka ami tau tensaun liu ba iha futuru, hanesan buat sira ne'ebé maka ami sei presiza halo no hadia, atu nune'e prestasaun ami nia Forsa no Servisu Seguransa no Protesaun Civil bele la'o hamutuk ho Instituisoens sira nia prestájiu ho espetativas ne'ebé iha ona, interna ka esternamente.

Setor Seguransa hanesan pilar ida ne'ebé importante no transversal ba dezenvolvimentu rai ida nian. Ita presiza iha setor Seguransa ida ne'ebé hetan fiar husi ema hotu no ema hotu bele iha konfiansa. Fundamental tebe tebes atu iha sistema seguransa ida ne'ebé forte, no bele garante no proteje direitu sidadaun sira nian, no mós bele fó dezenvolvimentu ida ne'ebé sustentadu.

Nune maka VI Governu Konstitusional iha hanoin atu halo armonizasaun no uniformizasaun ba lei sira ne'e, nune'e mós introduz reformas ne'ebé maka iha possibilidade halo konsolidasaun ba iha polítikas seguransa nian, atu bele garante funsionamentu Instituisaun dí'ak liu tan hodi haré ba Seguransa no Protesaun sidadaun sira nian.

Exelências
Señoras e Señores,

Iha semana ne'e nia laran prepara tiha ona asuntos teknikus ne'ebé ohin sei hala'o debate iha nível ministerial. Asuntu sira ne'e importante tebe tebes ba iha ita ida idak nia rai laran, sai hanesan importánsia dinâmika ba ita nia Komunidade no sei boot liu tan ba mundu tomak.

Prevensaun ba Kriminalidade no Polisiamentu Proximidade; Protesaun ba Natureza no Ambiente; Jestaun Sivil ba Krizes, Armas no Esplozivus; Investigasaun Kriminal; Prevensaun no Kombate hasoru Imigrasaun Ilegal no Tráfiku Seres Umanus; Observatório ba Fluxus Migratórius no Rede Polísia Feto sai hanesan áreas koperasaun ne'ebé ita hotu hotu nia paízes sei benefisia liu tan hodi fó benefísiu boot ba povu sira seluk no paízes iha mundu tomak.

Ita hanesan Komunidade ida ne'ebé promove dezenvolvimentu koperasaun multilateral bazeia ba respeito iha Direitus Umanus, maka semináriu internacional *"A CPLP em prol da Segurança Humana e Global"* sai hanesan oportunidade no priviléjiu boot ida ba interkâmbiu koñesimentus, esperiênsias no práttikas dí'ak ne'ebé dezenvolve ona husi ita ida idak nia Estadus-membrus.

Tema sira ne'ebé koalia kona ba polísia, imigrasaun, estrangeirus no fronteiras no mós ba protesaus sivil no bombeirus, ne'ebé halo análise no diskuti tiha ona iha loron hirak liu ba, sai hanesan asunto importante ba iha ita nia Komunidade hanesan paízes maun alin, no sai mós hanesan oportunidade ida hodi promove no fortalese dezenvolvimentu ita hotu hotu nia relasoens koperasaun.

Nune'e ita aproveita oportunidade iha Reuniaun Ministerial ida ne'e, hamutuk atu apresia propostas no konkluzoens Konsellu Xefe Polísia sira nian, Konsellu Diretores Nasionais

Migrasaun, Estranjeirus no Fronteiras, mós husi Konsellu Komandantes Nasionais/Diretores Nasionais/Prezidentes Salvasaun Públika/Protesaun Sivil no Bombeirus, hodi reafirma ita hotu nia kompromissu iha Deklarasaun Dili, ne'ebé sei asina iha lorokraik ida ne'e.

Exelénsias
Señoras e Señores

Moluk atu hakotu, hau hakarak hato'o hau nia lia fuan badak ida ba Prezidente sesante, Vice Ministru Interior Moçambique nian, ba nia apoiu no empeñu maka nia fó durante nia mandatu no mós ba realizasaun Reuniaun ida ne'e. Ba Ministru Interior Timor Leste nian, ne'ebé simu kna'ar hanesan Prezidente, bainhira simu kna'ar importante ida ne'e, hau fo votus susesu servisu ba iha ita nia Komunidade ida ne'e.

Aproveita mós atu fó agradesimentu ba Portugal ho esforsu koperasaun tomak iha área Seguransa, liu husi Guarda Nacional Republicana, fó ona kontribuisaun barak ba dezenvolvimentu ami nia Polísia Nasiona Timor-Leste ne'ebé sei jovem no konsolidasaun iha setor Seguransa.

Hau hakotu hodi fó hanoin hikas fali katak ita hotu hotu nia Governu sai hanesan responsável prinsipal ba konkretizasaun ita nia objetivus ne'ebé ita hakarak iha setor Seguransa no importansia atu servisu ho koperasaun, hodi bele garante katak ita hotu hotu sai benefisiadus ho hanoin ida deit ba futuru ida ne'ebé pasífiku no prósperu.

Dezeja ba imi hotu servisu di'ak no fila ho ksolok ba iha ida idak nia rain.

Dr. Rui Maria de Araújo
26 de outubro de 2015